

* * *

Քոշաքարում ես վազել եմ
Եղնիկի հետ երազ, Անուշ,
Զըմրուխտ սարում երազել եմ
Զընաշխարհիկ երազ, Անուշ:

5 Զըմրուխտ սարը ամպ է պատել,
Իմ արևի լույսը վատել,
Աստծուն խնդիրք արի շատ էլ՝
Ինձ չըտըվեց մուրազ, Անուշ:

Իմ մուրազը շատ էր շքեղ,
10 Դըրախտ պիտեր քաղաք ու գեղ.
Երգը հոսեր հառաչքի տեղ,
Սերն ու բարին՝ Արազ, Անուշ:

Շատն են եկել էսպես անցել,
Հազար՝ ափսոս էն մարդկանց էլ.
15 Ես էլ կերթամ, վեր եմ կացել,
էսքան վաղ ու վըռազ, Անուշ: